

福建通志

第柒拾叁册

共壹百册

福建名宦傳卷十一

元一

總轄

行中書省

燕只吉台徹里

一作徹凌

至元二十四年任福建行中書省平章政事令行

禁止民便安之汀漳劇盜歐狗久不平徹里身將戍兵申明約束晝則合圍山中夜則稅野偃旗仆鼓有降者勞以酒食慰遣之曰吾意汝豈反者耶良由官吏汙暴所致既來歸卽平民矣吾安忍汝罪其返汝耕桑安汝田里毋恐他柵聞者相率以出歐狗日浸南奔大兵隨之偷生塢中其黨縛致於軍血鋒刃者纔此一誠自是方三千里枹鼓不鳴卒贈徐國公諡忠肅

史弼字君佐一名塔剌渾博野人至元二十一年黃華反建寧又值霖雨米價湧貴弼時任浙西宣慰使發米十萬石以平價糶之而後聞於省省臣欲增其價弼曰吾不可失信寧輟吾俸足之益出十萬石建民賴不饑

二十九年拜福建行中書省平章政事

忙兀台蒙古達達兒氏世祖命兀台爲閩廣大都督行都元帥府事與江西右丞塔出會兵收降尋拜參知政事召赴闕陞左丞時左丞唆都行省福建未幾中書言唆都麾下擾民致南劍等路往往殺長吏叛及忙兀台至招徠七十二寨建寧漳汀稍獲安集有旨仍鎮閩轉右丞拜江淮行省平章政事

廉惠山海牙字光亮畏吾人希憲從子至治元年進士至正閒以福建行省右丞鎮延平邵武境內謐寧歲餘奉詔還治總備禦事且督賦稅從海道供京師朝廷賴焉

董文炳字彥明藁城人宋旣亡文炳以中書左丞奉詔討未下郡縣師旣踰嶺漳泉建邵皆送款惟興化汀未下方議招之或曰何以招爲偏師厭之振落抑墜耳文炳曰興化不服獨陳參政耳民則何辜不須臾忍耶未幾汀來歸興化又不至乃發兵討之閩人室家相保如故德之最深建生

祠祀焉陳參政文龍也

焦德裕字寬父雄州人通左氏春秋驍勇善射累立戰功至元十四年任福州行省參知政事宅心仁恕不尙苛刻

虎都鐵木祿至元末福建行省郎中延祐間大臣以浙東倭收商船貿易致亂奏遣宣慰閩浙撫戢兵民海陸靜謐

柏帖穆爾蒙古人居官所至廉能著稱至正間任福建行省郎中明兵至福州柏帖穆爾引妻妾坐樓端慷慨謂曰丈夫死國婦人死夫義也城且陷吾必死若等從乎皆泣曰敢不從縊而死者六人餘一女十歲一男三歲度女不能自死給之曰可稽顙拜佛保我拜下擎囊米壓之出其金珠畀男乳媼曰宗不可絕也可爲我抱匿民舍有急出金珠贖之有頃兵入城舉火自焚死人過其門咸爲流涕呼爲柏衙前

王翰字用文靈武人初除廬州路治中改福州路同知適三魁賊起地險猝難用兵翰自造壘諭降之累陞理問官總理永福羅源二縣泉州土帥

柳莽跋扈翰諭之悉解散擢福建江西行省郎中平章陳有定表授潮州總管元亡屏居永福山中明洪武中有薦之者翰歎曰女可更適人哉爲詩別友曰昔在潮陽我欲死宗祀如綫我無子彼時我死作忠臣覆宗斷祀良可恥今日徵書忽到門丁男屋下三人存寸刃在手固不惜一死了卻君親恩遂自引決翰工詩畫善書篆子偶見福州文苑

張庸字存中温州人性豪爽精太乙數以福建行省員外郎治兵於閩擢秘書少監刑部尙書以不降賊被殺

藍光字仲晦臨江人受業吳澄善詩文尤精考古制度以辟薦轉閩省照磨陞檢校闡清歲歉盜起光單騎往諭賊黨解散遂綜理閩清邑事以廉能稱後以靖亂功陞行省都事時八郡騷擾參政陳有定方事興復光總藩幕蹇蹇持正一言不合遂拂衣退省憲交章薦之會明兵下閩光隱居教授年九十九卒

呂公祖字景莊盩州人任福建行省理問沈毅有才累遷建興汀福總管

所至厚重見稱卒贈兵部尚書追封渤海郡侯諡正肅

平海行中書省

高興字功起蔡州人初以衢婺招討使從都元帥忙古台平福建漳三州至元十四年詔興立都元帥府於建寧鎮降政和黃華邵武高日新高從固等寇遷浙東宣慰使復平福建及溫台海洋羣盜十七年漳州盜數萬據高安寨官軍不能下詔以興爲征蠻副都元帥討之抵其壁賊乘高瞰下興令人挾束薪蔽身進至山半棄薪而退如是六日誘其矢石殆盡乃燃薪焚棚斬其賊魁十八年又攻破盜陳吊眼於千壁嶺敗浙西宣慰使黃華復叛興疾趨與福軍合平之後以參知政事行福建宣慰使事又遷福建行省右丞以征瓜哇功拜福建行省平章政事終左丞相卒諡武宣加封南陽王

宣慰使司

塔里赤康里人好讀書善騎射從丞相伯顏渡江領軍至福建所過秋毫

無犯降者如歸以功遷福建招討使時諸郡盜起而陳吊眼最盛擁眾五萬陷漳州行省承制命塔里赤爲閩廣大都督征南都元帥總四省軍復漳州生擒吊眼誅之後改福建宣慰使

宣慰使司都元帥府

搠思監元統初任鹽法久壞思監廉利病罷行之

百家奴父唆都有平閩功百家奴亦以平閩廣功爲海外諸番宣慰使兼福建道市舶提舉守福建俄兼福建道長司宣慰使都元帥是時福建多水災百家奴出私錢市米以賑貧民全活甚眾

彭廷堅字允誠

一作舜臣

瑞安人至正四年進士十年爲崇安尹屬鉛山寇周

良犯閩關捍禦有法暇日重新縣學立胡文定公書院嘗有蝦蟆仰鳴廳事前廷堅視之出使人蹤之得屍蓋其妻有外私而害之者遂正其罪陞同知建寧總管府事江西寇攻建陽廷堅率民兵克之進平浦城十二年攝都元帥府事與邵武路總管吳按攤不花夾攻邵武寇斬其魁董元帥

鐵和尚等邵武平以功陞宣慰司副元帥鎮邵武是冬寇陷建寧縣廷堅統兵復之尋奉檄節制建寧邵武二郡軍事盜侵政和松溪江南行臺御史中丞吳鐸督軍建寧檄廷堅至萬戶岳煥隸麾下縱卒爲暴廷堅繩以法煥懼使部卒詐爲賊兵突入交鋒遂遇害故吏張棨等奉柩歸崇安民哀泣如喪父母後行臺御史余觀行部獲煥斬之上其事於朝贈中奉大夫福建宣慰使司都元帥封忠愍侯所蒞郡邑皆祠祀之

提刑按察司

王惲字仲謀汲人至元二十六年任閩海道提刑按察使黜貪汙不法官吏決遣冤滯繫囚戒戍兵毋得寓民家剽營屋以居之每謂爲治在於得人因進言於朝曰福建連山距海實爲邊徼重地乃平定以來官吏貪殘致愚民往往嘯聚剽掠村落官兵致討又蹂踐之甚非一視同仁之意也今行省官僚如平章左丞尙缺宜特選清望素著有文武才略者以鎮靜之時行省方討劇賊鍾明亮惲復條陳利害曰福建歸附之民戶幾百萬

元史卷三十五
黃華一變十去四五今劇賊猖獗又酷於華況其地有溪山之險東擊西走出沒難測宜選精兵專命重臣節制以計討之庶可取也二十八年召至京師授翰林學士嘉義大夫

肅政廉訪司

程鉅夫初名文海後避諱以字行建昌人至元三十年由侍御史授福建廉訪使興學明教吏民畏愛

烏古孫澤字潤甫臨潢人唆都下福建辟爲元帥府提控案牘宋幼主人海張世傑攻泉州文天祥開府南劍閩中郡縣復從宋唆都拔興化怒其從陳瓚反覆下令屠城澤屢諫不聽乃說唆都曰張世傑方攻泉州自固其植待我定興化乃往圖之彼植日固莫若開其遺民使走泉南煽動之世傑且走是我不戰而完泉州捷於吾兵之馳球也唆都喜開南門縱民去得脫者甚眾世傑亦解泉州圍去福建旣平詔以澤爲行省都事朝京師元世祖喜澤善謀命知興化軍繼改軍爲路至元十六年授澤行總管

府事郡民應陳瓚戰死者吏援例籍其產澤曰國家至仁誅止陳瓚鬪死及無後者田廬貲產並給其族姻有司無所與乃下掩骼之令招集流亡置慈幼院收育道旁棄兒期年大興學校召長老率諸生講經肄業行鄉飲酒禮旁郡聞而慕之至大元年復來爲廉訪使閩人安其宿德卒謚正憲

趙宏偉字子英甘陵人後徙潁州延祐二年任廉訪使未幾以疾辭宏偉用戰功致通顯居官所至發官廩以活饑民延名儒以教後學他善政尤多卒謚貞獻

答里麻高昌人泰定元年任廉訪使朝廷遣宦官伯顏催督繡段橫取民財宣政院判官木鄰亦取賂於富僧答里麻皆劾罷之

拜降字子謙至順元年任廉訪使初閩有巨跖志在專欲以計盡去同列民罹其害文宗聞之亟遣拜降泣聞以拯塗炭拜降聞命卽行廉得巨跖狀聞於朝殛之稱剔奸穢撫摩瘡痍閩人大悅

貢師泰字泰甫宣城人早歲遊京師入胄監擢應奉翰林文字至正十五年爲福建廉訪使未幾除禮部尙書二十年除戶部尙書按部閩中以閩鹽易糧從海道轉給京師凡得糧數十萬石朝廷賴焉師泰文學知名優於政事嘗爲監察御史南人居臺省自師泰始

韓準字公衡沛縣人登進士第至正末以江西行省左丞改福建廉訪使遷侍御史請老未報明兵下閩城陷準藉臺堂下以喪禮自處吏來追其宣敕準取而枕之曰此吾所受於君也必欲取之並取吾首去吏不敢迫及病遂不服藥而卒

寶哥畏吾人至正初任廉訪副使廉潔有風力官吏畏威修職士民安樂安禮護世字正卿汝南人至正閒以監察御史任廉訪僉事按尤溪時告訐盈庭案牘多僞護世入境頓更弊政勵學校訪耆英問民疾苦去害興利威惠所加民皆畏愛

揭泮豐城人揭傒斯之子元末任廉訪僉事治建寧陳友諒兵攻杉關下

邵武據延平遂圍建寧吏民逃竄惟經略使曹顏不花尚在法詣與謀曹顏不花聞法至迎曰僉事猶未行耶法曰經略何爲殺此言今吾與經略致死時也獨走安之遂與畫策部散卒得千人命建寧總管阮德柔將之力戰逾十旬福州援兵繼至遂復延平等三州獲敗兵千餘人咸欲繫獄論其叛逆罪法曰大盜未殄可勝誅耶誅傑黠者數人餘悉縱之耕及諸將上功於朝法不及敘或爲法冤法曰職耳入明以例召稱疾不仕

范梈字亨父一字德機清江人由翰林供奉改閩海道知事閩有文繡局取良家子爲繡工吏因爲奸梈作歌詩述其弊廉訪使取以聞遂得罷遣梈精古學砥礪名節與揭傒斯虞集楊載齊名所至興學教民雪理冤滯卒吳澄志其墓

行御史臺

野訥畏吾人武宗時以侍御史兼將作院使閩有繡工官大集民間子女居肆督責吏因爲奸利野訥奏罷之閩人感悅

行宣政院

朶兒至正二十七年任明兵由海道取福州死之

都轉運鹽使司

劉志字國惠至正閒牛田場鹽課司丞時四郊多壘軍需百費皆出於鹽
人民流散志悉招復之

福建名宦傳卷十二

元二 各路

福州路

脫權扎刺兒台氏至元十五年以西征功加定遠大將軍福州路總管達魯花赤平閩盜

岳天楨大名府冠氏人至元間任福州路總管平尤溪賊秩滿改青州

熊朋來字與可豫章人宋咸淳進士元初隱處州里江西省臣列薦爲閩海提舉儒學朝廷以東南儒學之士惟福建廬陵最盛特起朋來爲兩郡教授所至考古篆籀文字調律呂協歌詩以興雅樂制器定辭必則古式旣滿考調建安主簿不赴晚以福清州判官致仕

劉直內東武人大德六年府學教授嘗改勅尊道堂以祀先賢而列祀鄉賢名宦於兩廡又鑿池構亭爲諸生游息之所卒祀於學

馬合麻色目人延祐中爲古田達魯花赤在縣三年苞苴不入權勢屏息

聽訟明察如神

胡希仁字時中吉水人至元間繇茂才爲古田尹有餽金千薦者卻不受平章燕支不花聞而美之曰子何減楊震

馬合馬沙字士達至正間福清達魯花赤適軍興乏費馬沙出已俸給之屏隸卒之爲民害者斷獄明允人不敢欺清蒜嶺宏路二驛馬政瀕海有兇徒竄名兵籍得私齧輒誣良民以取賄馬沙毅然曰吾豈顧身之利害俾百姓罹其毒耶痛懲以法境內大安

申國輔朝鮮人至正十二年知福清州前守林泉生改勑學宮未竣時紅巾驛騷民方荷戈從事國輔指學校曰此吾金城也隣封目爲迂闊及賊圍三山陷長樂獨州民晏然賊不犯境

劉濬字濟川河南人至正間爲連江縣寧善鄉巡檢江西賊帥王善寇閩濬妻眞定史氏故相家女有才識與濬謀盡出匱物募壯丁命仲子健將之賊破羅源分道攻福州濬拒戰屢捷俄又與賊遇濬突陣斬前鋒五人

賊兵大至濬中箭墜馬健下馬掖之俱被獲濬戟手大罵賊怒斫濬手足罵彌厲遂割其舌而死賊義之乃舍健健歸請兵於帥府復父讐弗聽健盡散家貲結死士百餘人詐爲工商流丐入賊中夜半發火大譟賊驚擾自相屠戮健手斬殺父者張破四併擒善等磔之事聞贈濬福建行省檢校官授健古田尹立濬祠福州北門外

丁得孫字惟一鄞縣人至正間爲羅源尹寬惠明信詞訟清簡興起斯文士爲立碑繪像以祀

張伯顏字正卿吳門人至順初知福寧州時州學養膳無田伯顏爲置田育士至今祀之

王伯顏字伯敬霑化人至正九年以朝列大夫守福寧有異政陞本省轉運副使會紅巾警報至州民環馬首泣留伯顏招募訓練團結鄉勇分兵壘四門自率中子相引兵擊賊於楊梅嶺敗之已賊大集還保州治賊突入城伯顏奮力與戰馬蹶被執死之中子相亦同死相妻潘閉口絕粒與

二幼女皆死福寧平事聞贈嘉義大夫濟南路總管上輕車都尉追封太
原郡侯行部御史余闕立廟祀之長子楨襲父爵除紹興路總管張士誠
陷郡亦不屈死

忙兀歹回回人皇慶間福安尹以廉潔正大律身以孝悌忠信導民敬老
愛士務農重穀善政厯厯可紀

高琛燕山人至順間福安尹剛毅正直表孝弟興學校鋤強植善厚本抑
末去後邑人思之

胡璉懷孟人至大間主福安簿持身廉謹以德化民遷建廟學勅薛補闕
祠造溪口諸橋民懷之

建寧路

暗都刺色目人至順間建寧路總管廉勤愛民修學崇祀勸勉生徒

鄒伯顏字從吉高唐人至元初崇安尹崇安大姓田連跨數都細民糧僅
升合配役不均小民重困伯顏以糧多寡均之趙清獻陂歲久湮塞伯顏